

INUIT ATAQATIGIIT

Inatsisartuni



UKA 2018/173
17.10.18
Sofia Geisler

Misiliilluni aningaasaliineq nunaqarfinni qerititsivinnik sanaartornissamik annertusaanissamullu tapiisarnerni periutsit pissutsillu pitsaanerpaat anguniarlugit qanoq aaqqiivigineqarsinnaanera pillugit Inatsisartut Naalakkersuisut nassuiaasioqqullugit peqquneqarnissaanik aalajangiiffigisassatut siunnersuut. Nassuiaasiornermi isumalluutit suliffissaqartitsinerit kiisalu aningaasaqarnermut tunngasut kommunit, inuussutissarsiornermik ingerlatsisut aammalu KANUNUPE-p misilittagaat ilaatigut ilanngunneqassapput. Nassuiaat Inatsisartunut agguanneqassaaq, tamatumani nassuiaatip inerniliineri AIS20-imut ilanngullugit suliarineqarsinnaalerlugit.

(Inatsisartuni ilaasortaq Peter Olsen, Inuit Ataqatigiit)

Nutaaliorneq, ineriartortitsineq atorluaanerlu pillugit imaqartoq apeqqut pingaarutilik Peter Olsenip qaqippaa. Tassani kisimi pineqanngillat nioqqutissiorfiit aammali pineqarput aalisagaqatigiiaat imartatsinniit qaqittakkagut iluaqutigisartakkagullu.

Inuit amerlasuut sumi najugaqarnissaminnut aalajangertarnerannut sumiiffinni ataasiakkaani tunitsiviit aalajangeqataasartut qularnanngilaq. Aalisarnermik inuussutissarsiuteqartut qanoq isertitaqarsinnaanerannut amerlasuutigut aalajangiisuusarput tunitsiviit qanoq angitiginerat assartuussinermullu attuumassuteqartut.

Inuit Ataqatigiinniit ilisimaaraarput tunitsivinnik pilersitsinerit alliliinerillu pillugit apeqqut immini massuma inersuup avataani inissisimammat.

Taamaattoq periarfissaq manna aqcutigalugu aalisakkanik nioqqutissiortut apeqqutini nutaaliornermut, ineriartortitsinerimut atorluaanermullu tunngasuni naapiffeqarnissaat kaammattuutigissavarput. Tamannami pisortat qanoq akulerutitinneqarsinnaanerannut tamatumalu qanoq annertutigisumik pinissaanut aalajangiisuulluinnarsinnaammat.

Aalisakkanik niuernerme ullut tamaasa sunniutaasartut aporfiusartullu tamatta nalunngilagut. Akinut, qerititsiviit angissusaannut, tunisinerme periarfissanut, assartuinnermullu amerlasuutigut tunngasarput. Nunat Avannarliit Ministerrådiata aaqqissuusaanik Sisimiuni qaammat kingulleq isumasioqatigiinneq ingerlanneqarpoq. Sammineqartoq tassaavoq saarullinnik taakkulu ilaqaannik aalisarnermi

iluaqutissanik atorluaaneq. Aalisakkat pineqartut saniatigut aalisakkanik allanik qaqitatsinnik atorluaanissaq aamma ilaavoq. Uanimi pineqarpoq nutaaliornitsigut atorluaanitsigullu nioqqutissiassamut nioqqutissianullu tunngatillugu akigissaartitsinerulersinnaaneq.

Oqariartuutigisarput tassaavoq killilersuutitut misigisartakkatta nutaaliornikkut periarfissanngortinniarnissaat.

Inuit Ataqatigiinniit kaammattuutigissavarput inuussutissarsiortut kattuffiillu attuumassuteqartut Peter Olsenip siunnersuutaata suliareqqinnerani akuutinneqarnissaat.

Taamatut oqaaseqarluta Peter Olsenip siunnersuutaa ataatsimiititaliamut attuumassuteqartumut ingerlateqqinneqarnissaa innersuussutigissavarput.